

《梵網經菩薩戒本》¹後秦·龜茲國三藏鳩摩羅什譯

爾時，盧舍那佛爲此大衆，略開百千恒河沙不可說法門中心地，如毛頭許。是過去一切佛已說，未來佛當說，現在佛今說；三世菩薩已學、當學、今學。我已百劫修行是心地，號吾爲盧舍那。汝諸佛，轉我所說與一切衆生，開心地道。時蓮華臺藏世界，赫赫天光獅子座上盧舍那佛放光，光告千華上佛：「持我心法門品而去；復轉爲千百億釋迦及一切衆生，次第說我上心地法門品。汝等受持讀誦，一心而行。」

爾時，千華上佛千百億釋迦從蓮華藏世界赫赫獅子座起，各各辭退，舉身放不可思議光，光皆化無量佛，一時以無量青、黃、赤、白華供養盧舍那佛。受持上說心地法門品竟，各各從此蓮華藏世界而沒。沒已，入體性虛空華光三昧，還本源世界，閻浮提菩提樹下，從體性虛空華光三昧出。出已，方坐金剛千光王座，及妙光堂，說十世界法門海。復從座起，至帝釋宮，說十住。復從座起，至炎天中，說十行。復從座起，至第四天中，說十迴向。復從座起，至化樂天，說十禪定。復從座起，至他化天，說十地。復至一禪中，說十金剛。復至二禪中，說十忍。復至三禪中，說十願。復至四禪中，摩醯首羅天王宮，說我本源蓮華藏世界，盧舍那佛所說心地法門品。其餘千百億釋迦，亦復如是，無二無別。如〈賢劫品〉中說。

爾時，釋迦牟尼佛從初現蓮華藏世界，東方來入天王宮中，說《魔受化經》已，下生南閻浮提，迦夷羅國。母名摩耶，父字白淨，吾名悉達；七歲出家，三十成道，號吾爲釋迦牟尼佛。於寂滅道場，坐金剛華光王座。乃至摩醯首羅天王宮，其中次第十住處所說。時佛觀諸大梵天王網羅幢，因爲說無量世界猶如網孔。一一世界，各各不同，別異無量。佛教門，亦復如是。吾今來此世界八千返。爲此娑婆世界，坐金剛華光王座，乃至摩醯首羅天王宮，爲是中一切大衆，略開心地法門品竟。

復從天王宮，下至閻浮提菩提樹下，爲此地上一切衆生、凡夫痴闇之人，說我本盧舍那佛心地中，初發心中常所誦一戒，光明金剛寶戒。是一切佛本源、一切菩薩本源，佛性種子。一切衆生皆有佛性；一切意、識、色、心，是情、是心，皆入佛性戒中。當當常有因故，當當常住法身。如是十波羅提木叉出於世界，是法戒，是三世一切衆生頂戴受持。吾今當爲此大衆，重說十無盡藏戒品，是一切衆生戒本源，自性清淨。

¹ 戒本依據：《梵網菩薩戒本》錄自《梵網經盧舍那佛說菩薩心地戒品》第十卷下，後秦龜茲國三藏鳩摩羅什譯。所引戒本內容，錄自南林學佛院惟俊比丘尼彙編《梵網菩薩戒說戒儀軌》。

我今盧舍那	方坐蓮華臺	周匝千華上	復現千釋迦
一華百億國	一國一釋迦	各坐菩提樹	一時成佛道
如是千百億	盧舍那本身	千百億釋迦	各接微塵衆
俱來至我所	聽我誦佛戒	甘露門則開	是時千百億
還至本道場	各坐菩提樹	誦我本師戒	十重四十八
戒如明日月	亦如瓔珞珠	微塵菩薩衆	由是成正覺
是盧舍那誦	我亦如是誦	汝新學菩薩	頂戴受持戒
受持是戒已	轉授諸衆生	諦聽我正誦	佛法中戒藏
波羅提木叉	大衆心諦信	汝是當成佛	我是已成佛
常作如是信	戒品已具足	一切有心者	皆應攝佛戒
衆生受佛戒	即入諸佛位	位同大覺已	真是諸佛子
大衆皆恭敬	至心聽我誦		

爾時，釋迦牟尼佛初坐菩提樹下成無上覺。初結菩薩波羅提木叉，孝順父母、師僧、三寶，孝順至道之法。孝名為戒，亦名制止。佛即口放無量光明。是時，百萬億大衆：諸菩薩、十八梵天、六欲天子、十六大國王，合掌至心，聽佛誦一切佛大乘戒。佛告諸菩薩言：「我今半月半月自誦諸佛法戒。汝等一切發心菩薩亦誦；乃至十發趣、十長養、十金剛、十地諸菩薩亦誦。是故戒光從口出，有緣非無因。故光光，非青黃赤白黑，非色非心，非有非無，非因果法；是諸佛之本源，菩薩之根本，是大衆諸佛子之根本。是故大衆諸佛子，應受持，應讀誦，善學。佛子！諦聽：若受佛戒者，國王王子、百官宰相、比丘比丘尼、十八梵天六欲天子、庶民黃門、姪男姪女、奴婢、八部鬼神金剛神、畜生乃至變化人，但解法師語，盡受得戒；皆名第一清淨者。」

佛告諸佛子言：「有十重波羅提木叉。若受菩薩戒，不誦此戒者，非菩薩、非佛種子。我亦如是誦。一切菩薩已學，一切菩薩當學，一切菩薩今學。已略說菩薩波羅提木叉相貌，是事應當學，敬心奉持。」

【菩薩十重戒】

殺戒第一

佛言：「佛子！若自殺，教人殺，方便讚歎殺，見作隨喜；乃至咒殺。殺因，殺緣，殺法，殺業。乃至一切有命者，不得故殺。是菩薩應起常住慈悲心、孝順心，方便救護一切衆生。而反恣心快意殺生者，是菩薩波羅夷罪。」

盜戒第二

若佛子！自盜，教人盜，方便盜；咒盜。盜因，盜緣，盜法，盜業。乃至鬼神、有主、劫賊物，一切財物；一針一草，不得故盜。而菩薩應生佛性、孝順、慈悲心，常助一切人生福生樂。而反更盜人財物者，是菩薩波羅夷罪。」

姪戒第三

若佛子！自姪，教人姪；乃至一切女人，不得故姪。姪因，姪緣，姪法，姪業。乃至畜生女、諸天鬼神女，及非道行姪。而菩薩應生孝順心，救度一切衆生，淨法與人。而反更起一切人姪，不擇畜生，乃至母女姊妹六親行姪，無慈悲心者，是菩薩波羅夷罪。

妄語戒第四

若佛子！自妄語，教人妄語，方便妄語。妄語因，妄語緣，妄語法，妄語業。乃至不見言見，見言不見；身心妄語。而菩薩常生正語正見，亦生一切衆生正語正見。而反更起一切衆生邪語邪見邪業者，是菩薩波羅夷罪。

酤酒戒第五

若佛子！自酤酒，教人酤酒。酤酒因，酤酒緣，酤酒法，酤酒業。一切酒不得酤，是酒起罪因緣。而菩薩應生一切衆生明達之慧。而反更生一切衆生顛倒之心者，是菩薩波羅夷罪。

說四衆過戒第六

若佛子！自說出家在家菩薩、比丘比丘尼罪過，教人說罪過。罪過因，罪過緣，罪過法，罪過業。而菩薩聞外道惡人及二乘惡人，說佛法中非法非律；常生悲心，教化是惡人輩，令生大乘善信。而菩薩反更自說佛法中罪過者，是菩薩波羅夷罪。

自讚毀他戒第七

若佛子！自讚毀他，亦教人自讚毀他。毀他因，毀他緣，毀他法，毀他業。而菩薩應代一切衆生受加毀辱；惡事自向己，好事與他人。若自揚己德，隱他人好事，令他人受毀者，是菩薩波羅夷罪。

慳惜加毀戒第八

若佛子！自慳，教人慳。慳因，慳緣，慳法，慳業。而菩薩見一切貧窮人來乞者，隨前人所須，一切給與。而菩薩以惡心、瞋心，乃至不施一錢、一針、一草；有求法者，不爲說一句、一偈、一微塵許法；而反更罵辱者，是菩薩波羅夷罪。

瞋不受悔戒第九

若佛子！自瞋，教人瞋。瞋因，瞋緣，瞋法，瞋業。而菩薩應生一切衆生中善根無諍之事，常生悲心。而反更於一切衆生中，乃至於非衆生中，以惡口罵辱，加以手打及以刀杖，意猶不息；前人求悔，善言懺謝，猶瞋不解者，是菩薩波羅夷罪。

謗三寶戒第十

若佛子！自謗三寶，教人謗三寶。謗因，謗緣，謗法，謗業。而菩薩見外道及以惡人一言謗佛音聲，如三百鉞刺心。況口自謗，不生信心、孝順心；而反更助惡人、邪見人謗者，是菩薩波羅夷罪。

善學諸仁者！是菩薩十波羅提木叉，應當學。於中不應一一犯如微塵許，何況具足犯十戒。若有犯者，不得現身發菩提心；亦失國王位轉輪王位，亦失比丘比丘尼位，亦失十發趣、十長養、十金剛、十地，佛性常住妙果，一切皆失；墮三惡道中，二劫三劫不聞父母、三寶名字；以是不應一一犯。汝等一切諸菩薩今學、當學、已學。

如是十戒，應當學，敬心奉持。〈八萬威儀品〉，當廣明。」

佛告諸菩薩言：「已說十波羅提木叉竟。四十八輕今當說。」

【菩薩四十八輕戒】

輕慢師長戒第一

佛言：「若佛子！欲受國王位時、受轉輪王位時、百官受位時，應先受菩薩戒。一切鬼神救護王身、百官之身，諸佛歡喜。既得戒已，生孝順心、恭敬心，見上座、和上、阿闍梨、大同學同見同行者，應起承迎禮拜問訊。而菩薩反生憍心、慢心、痴心，不起承迎禮拜，一一不如法供養；以自賣身、國城、男女、七寶、百物而供給之。若不爾者，犯輕垢罪。」

飲酒戒第二

若佛子！故飲酒，而生酒過失無量。若自身手過酒器與人飲酒者，五百世無手；何況自飲。不得教一切人飲，及一切衆生飲酒；況自飲酒。若故自飲、教人飲者，犯輕垢罪。

食肉戒第三

若佛子！故食肉。一切肉不得食，斷大慈悲性種子；一切衆生見而捨去。是故一切菩薩，不得食一切衆生肉，食肉得無量罪。若故食者，犯輕垢罪。

食五辛戒第四

若佛子！不得食五辛：大蒜、革葱、慈葱、蘭葱、興蘘；是五種一切食中不得食。若故食者，犯輕垢罪。

不舉教讎戒第五

若佛子！見一切衆生犯八戒、五戒、十戒，毀禁、七逆、八難；一切犯戒罪，應教讎悔。而菩薩不教讎悔，共住，同僧利養；而共布薩，同一衆住說戒；而不舉其罪，教悔過者，犯輕垢罪。

不敬請法戒第六

若佛子！見大乘法師、大乘同學同見同行，來入僧坊、舍宅、城邑，若百里千里來者。即起，迎來送去，禮拜供養；日日三時供養；日食三兩金，百味飲食、床座醫藥，供事法師。一切所須，盡給與之。常請法師三時說法，日日三時禮拜，不生瞋心、患惱之心，爲法滅身，請法不懈。若不爾者，犯輕垢罪。

不聽經律戒第七

若佛子！一切處有講毘尼經律，大宅舍中講法處。是新學菩薩應持經律卷，至法師所，聽受諮問。若山林樹下、僧地房中、一切說法處，悉至聽受。若不至彼聽受者，犯輕垢罪。

背正向邪戒第八

若佛子！心背大乘常住經律，言非佛說；而受持二乘聲聞、外道惡見一切禁戒、邪見經律者，犯輕垢罪。

不瞻病苦戒第九

若佛子！見一切疾病人，常應供養，如佛無異。八福田中，看病福田，第一福田。若父母、師僧、弟子疾病，諸根不具，百種病苦惱，皆養令瘥。而菩薩以惡心瞋恨，不至僧房中、城邑曠野山林道路中，見病不救者，犯輕垢罪。

畜諸殺具戒第十

若佛子！不得畜一切刀、杖、弓、箭、鎗、斧、鬥戰之具，及惡羅網、殺生之器，一切不得畜。而菩薩乃至殺父母尚不加報，況餘一切衆生。若故畜一切刀杖者，犯輕垢罪。

如是十戒，應當學，敬心奉持。下〈六度品〉中，當廣明。」

通國入軍戒第十一

佛言：「佛子！不得爲利養惡心故，通國使命，軍陣合會，興師相伐，殺無量衆生。而菩薩尚不得入軍中往來，況故作國賊。若故作者，犯輕垢罪。」

傷慈販賣戒第十二

若佛子！故販賣良人奴婢六畜、市易棺材板木盛死之具，尚不自作，況教人作。若故作者，犯輕垢罪。

無根謗人戒第十三

若佛子！以惡心故，無事謗他良人善人、法師師僧、國王貴人，言犯七逆十重。於父母兄弟六親中，應生孝順心、慈悲心。而反更加於逆害，墮不如意處者，犯輕垢罪。

放火損燒戒第十四

若佛子！以惡心故，放大火燒山林曠野；四月乃至九月放火。若燒他人家屋宅、城邑、僧房、田木及鬼神官物，一切有主物，不得故燒。若故燒者，犯輕垢罪。

法化違宗戒第十五

若佛子！自佛弟子及外道六親，一切善知識。應一一教受持大乘經律，應教解義理；使發菩提心，十發趣心、十長養心、十金剛心；三十心中，一一解其次第法用。而菩薩以惡心、瞋心，橫教他二乘聲聞經律、外道邪見論等，犯輕垢罪。

惜法規利戒第十六

若佛子！應好心先學大乘威儀經律，廣開解義味。見後新學菩薩有從百里千里來求大乘經律，應如法爲說一切苦行：若燒身、燒臂、燒指；若不燒身臂指供養諸佛，非出家菩薩。乃至餓虎狼獅子、一切餓鬼，悉應捨身肉手足而供養之。然後一一次第爲說正法，使心開意解。而菩薩爲利養故，應答不答，倒說經律，文字無前無後，謗三寶說者，犯輕垢罪。

依官強乞戒第十七

若佛子！自爲飲食、錢物、利養、名譽故，親近國王王子大臣百官，恃作形勢，乞索、打拍、牽挽、橫取錢物。一切求利，名爲惡求多求。教他人求。都無慈心、無孝順心者，犯輕垢罪。

無知爲師戒第十八

若佛子！學誦戒者，日夜六時持菩薩戒，解其義理、佛性之性。而菩薩不解一句一偈戒律因緣，詐言能解者，即爲自欺誑，亦欺誑他人。一一不解一切法，而爲他人作師授戒者，犯輕垢罪。

鬥謗欺賢戒第十九

若佛子！以惡心故，見持戒比丘手捉香爐，行菩薩行；而鬥搆兩頭，謗欺賢人，無惡不造。若故作者，犯輕垢罪。

不能救生戒第二十

若佛子！以慈心故，行放生業。一切男子是我父，一切女人是我母，我生生無不從之受生，故六道衆生皆是我父母。而殺而食者，即殺我父母。亦殺我故身：一切地水是我先身，一切火風是我本體。故常行放生；生生受生，常住之法，教人放生。若見世人殺畜生時，應方便救護，解其苦難。常教化講說菩薩戒，救度衆生。若父母兄弟死亡之日，應請法師講菩薩戒經，福資亡者，得見諸佛，生人天上。若不爾者，犯輕垢罪。

如是十戒，應當學，敬心奉持，如〈滅罪品〉中，廣明一一戒相。」

無慈酬怨戒第二十一

佛言：「佛子！不得以瞋報瞋，以打報打。若殺父母兄弟六親，不得加報；若國主爲他人殺者，亦不得加報。殺生報生，不順孝道。尙不畜奴婢，打拍罵辱，日日起三業，口罪無量；況故作七逆之罪。而出家菩薩無慈報讎，乃至六親中故報者，犯輕垢罪。

慢人輕法戒第二十二

若佛子！初始出家，未有所解。而自恃聰明、有智，或恃高貴、年宿，或恃大姓、高門、大解、大福、饒財、七寶，以此憍慢，而不諮受先學法師經律。其法師者，或小姓、年少、卑門、貧窮、下賤、諸根不具；而實有德，一切經律盡解。而新學菩薩不得觀法師種姓，而不來諮受法師第一義諦者，犯輕垢罪。

輕新求學戒第二十三

若佛子！佛滅度後，欲以好心受菩薩戒時，於佛菩薩形像前自誓受戒。當七日佛前懺悔，得見好相，便得戒；若不得好相，應二七、三七，乃至一年，要得好相；得好相已，便得佛菩薩形像前受戒。若不得好相，雖佛像前受戒，不得戒。若現前先受菩薩戒法師前受戒時，不須要見好相。何以故？以是法師師師相授故，不須好相。是以法師前受戒，即得戒；以生重心故，便得戒。若千里內無能授戒師，得佛菩薩形像前受戒，而要見好相。若法師自倚解經律、大乘學戒，與國王太子百官以爲善友；而新學菩薩來問若經義、律義，輕心、惡心、慢心，不一一好答問者，犯輕垢罪。

背大向小戒第二十四

若佛子！有佛經律，大乘法、正見、正性、正法身；而不能勤學修習。而捨七寶；反學邪見：二乘、外道、俗典、阿毘曇、雜論、書記。是斷佛性，障道因緣，非行菩薩道。若故作者，犯輕垢罪。

爲主失儀戒第二十五

若佛子！佛滅度後，爲說法主、爲行法主、爲僧房主、教化主、坐禪主、行來主，應生慈心，善和鬥訟，善守三寶物，莫無度用如自己有。而反亂衆鬥諍，恣心用三寶物者，犯輕垢罪。

待賓乖式戒第二十六

若佛子！先在僧房中住，後見客菩薩比丘來入僧房、舍宅、城邑、國王宅舍中，乃至夏坐安居處，及大會中。先住僧應迎來送去，飲食供養，房舍、臥具、繩床，事事給與。若無物，應賣自身及以男女，供給所須，悉以與之。若有檀越來請衆僧，客僧有利養分，僧房主應次第差客僧受請。而先住僧獨受請，不差客僧，僧房主得無量罪。畜生無異，非沙門，非釋種姓。若故作者，犯輕垢罪。

受別請戒第二十七

若佛子！一切不得受別請，利養入己。而此利養屬十方僧。而別受請，即取十方僧物入己。八福田諸佛、聖人、一一師僧父母病人物，自己用故，犯輕垢罪。

故別請僧戒第二十八

若佛子！有出家菩薩、在家菩薩及一切檀越，請僧福田求願之時，應入僧房間知事人。今欲次第請者，即得十方賢聖僧。而世人別請五百羅漢、菩薩僧，不如僧次一凡夫僧。若別請僧者，是外道法，七佛無別請法，不順孝道。若故別請僧者，犯輕垢罪。

惡伎損生戒第二十九

若佛子！以惡心故、爲利養故，販賣男女色、自手作食、自磨自舂、占相男女、解夢吉凶、是男是女、咒術工巧、調鷹方法，和合百種毒藥千種毒藥、蛇毒、生金銀、蠱毒；都無慈心。若故作者，犯輕垢罪。

違禁行非戒第三十

若佛子！以惡心故，自身謗三寶，詐現親附，口便說空、行在有中；爲白衣通致，男女交會，姪色縛著；於六齋日、年三長齋月，作殺生劫盜、破齋犯戒者，犯輕垢罪。

如是十戒，應當學，敬心奉持。〈制戒品〉中，廣解。」

見厄不救戒第三十一

佛言：「佛子！佛滅度後，於惡世中，若見外道、一切惡人、劫賊，賣佛菩薩父母形像、販賣經律、販賣比丘比丘尼、亦賣發心菩薩道人，或爲官使，與一切人作奴婢者。而菩薩見是事已，應生慈心，方便救護；處處教化，取物贖佛菩薩形像、及比丘比丘尼、發心菩薩、一切經律。若不贖者，犯輕垢罪。

畜作非法戒第三十二

若佛子！不得畜刀仗弓箭，販賣輕秤小斗；因官形勢取人財物、害心繫縛、破壞成功，長養貓狸豬狗。若故作者，犯輕垢罪。

觀聽作惡戒第三十三

（一）觀鬥

若佛子！以惡心故，觀一切男女等鬥、軍陣兵將劫賊等鬥。

（二）聽樂

亦不得聽吹貝、鼓、角、琴、瑟、箏、笛、笙篴、歌叫、伎樂之聲。

（三）博戲

不得擲蒲、圍碁、波羅賽戲、彈碁、六博、拍毬、擲石、投壺、八道行城。

(四) 卜筮

爪鏡、蓍草、楊枝、鉢盂、鬻髑，而作卜筮。

(五) 賊使

不得作盜賊使命。

一一不得作。若故作者，犯輕垢罪。

堅持守心戒第三十四

若佛子！護持禁戒，行住坐臥，日夜六時，讀誦是戒；猶如金剛，如帶持浮囊欲度大海，如草繫比丘。常生大乘善信：自知我是未成之佛，諸佛是已成之佛。發菩提心，念念不去心。若起一念二乘、外道心者，犯輕垢罪。

不發大願戒第三十五

若佛子！常應發一切願：孝順父母、師僧、三寶；願得好師、同學、善友知識；常教我大乘經律，十發趣、十長養、十金剛、十地；使我開解，如法修行；堅持佛戒，寧捨身命，念念不去心。若一切菩薩不發是願者，犯輕垢罪。

不起十願戒第三十六

若佛子！發十大願已，持佛禁戒。作是願言：寧以此身投熾然猛火大坑刀山，終不毀犯三世諸佛經律，與一切女人作不淨行。復作是願：寧以熱鐵羅網千重周匝纏身，終不以破戒之身，受於信心檀越一切衣服。復作是願：寧以此口吞熱鐵丸及大流猛火經百千劫，終不以破戒之口，食信心檀越百味飲食。復作是願：寧以此身臥大猛火羅網熱鐵地上，終不以破戒之身，受信心檀越百種床座。復作是願：寧以此身受三百鉞刺經一劫二劫，終不以破戒之身，受信心檀越百味醫藥。復作是願：寧以此身投熱鐵鑊經百千劫，終不以破戒之身，受信心檀越千種房舍屋宅園林田地。復作是願：寧以鐵鎚打碎此身從頭至足令如微塵，終不以破戒之身，受信心檀越恭敬禮拜。復作是願：寧以百千熱鐵刀鉞挑其兩目，終不以破戒之心，視他好色。復作是願：寧以百千鐵錐遍剗刺耳根經一劫二劫，終不以破戒之心，聽好音聲。復作是願：寧以百千刃刀割去其鼻，終不以破戒之心，貪嗅諸香。復作是願：寧以百千刃刀割斷其舌，終不以破戒之心，食人百味淨食。復作是願：寧以利斧斬斫其身，終不以破戒之心，貪著好觸。復作是願：願一切衆生悉得成佛。而菩薩若不發是願者，犯輕垢罪。

故入難處戒第三十七

若佛子！常應二時頭陀，冬夏坐禪，結夏安居。常用楊枝、澡豆、三衣、瓶、鉢、坐具、錫杖、香爐、漉水囊、手巾、刀子、火燧、鑷子、繩床、經、律、佛像、菩薩形像。而菩薩行頭陀時及遊方時，行來百里千里，此十八種物常隨其身。頭陀者，從正月十五日至三月十五日、八月十五日至十月十五日；是二時中，此十八種物，常隨其身，如鳥二翼。若布薩日，新學菩薩半月半月布薩誦十重四十八輕戒時，於諸佛菩薩形像前，一人布薩即一人誦，若二人三人乃

至百千人亦一人誦；誦者高座，聽者下坐；各各披九條、七條、五條袈裟。結夏安居，一一如法。若頭陀時，莫入難處：若國難、惡王、土地高下、草木深邃、獅子虎狼、水火風難、及以劫賊、道路毒蛇；一切難處，悉不得入。若頭陀行道，乃至夏坐安居，是諸難處，悉不得入。若故入者，犯輕垢罪。

衆坐乖儀戒第三十八

若佛子！應如法次第坐：先受戒者在前坐，後受戒者在後坐。不問老少、比丘比丘尼、貴人國王王子、乃至黃門奴婢，皆應先受戒者在前坐，後受戒者次第而坐。莫如外道痴人，若老若少，無前無後，坐無次第，如兵奴之法；我佛法中，先者先坐，後者後坐。而菩薩不次第坐者，犯輕垢罪。

應講不講戒第三十九

若佛子！常應教化一切衆生：建立僧房、山林、園、田、立作佛塔、冬夏安居坐禪處所、一切行道處，皆應立之。而菩薩應爲一切衆生，講說大乘經律。若疾病、國難、賊難、父母、兄弟、和上、阿闍梨亡滅之日，及三七日乃至七七日，亦應讀誦講說大乘經律。齋會求福、行來治生、大火所燒、大水所漂、黑風所吹船舫、江河大海羅刹之難，亦應讀誦講說此經律。乃至一切罪報、三報、七逆、八難、杻械枷鎖繫縛其身、多姪、多瞋、多愚痴、多疾病，皆應讀誦講說此經律。而新學菩薩若不爾者，犯輕垢罪。

如是九戒，應當學，敬心奉持。〈梵壇品〉，當說。」

受戒非儀戒第四十

佛言：「佛子！與人受戒時，不得簡擇。一切國王王子、大臣百官、比丘比丘尼、信男信女、姪男姪女、十八梵天六欲天子、無根二根、黃門奴婢、一切鬼神，盡得受戒。應教身所著袈裟，皆使壞色，與道相應，皆染使青黃赤黑紫色。一切染衣乃至臥具，盡以壞色。身所著衣，一切染色。若一切國土中，國人所著衣服，比丘皆應與其俗服有異。若欲受戒時，師應問言：『汝現身不作七逆罪耶？菩薩法師不得與七逆人現身受戒。』七逆者：出佛身血、殺父、殺母、殺和上、殺阿闍梨、破羯磨轉法輪僧、殺聖人。若具七遮，即現身不得戒；餘一切人盡得受戒。出家人法：不向國王禮拜，不向父母禮拜，六親不敬，鬼神不禮。但解法師語，有百里千里來求法者，而菩薩法師以惡心瞋心，而不即與授一切衆生戒者，犯輕垢罪。」

無德詐師戒第四十一

若佛子！教化人起信心時，菩薩與他人作教誡法師者，見欲受戒人，應教請二師：和上、阿闍梨。二師應問言：『汝有七遮罪否？』若現身有七遮，師不應與受戒；無七遮者，得受。若有犯十戒者，應教懺悔：在佛菩薩形像前，日夜六時，誦十重四十八輕戒，苦到禮三世千佛，得見好相。若一七日、二三七日、乃至一年，要見好相。好相者：佛來摩頂，見光、見華、種種異相，便得

滅罪。若無好相，雖懺無益；是人現身亦不得戒，而得增受戒。若犯四十八輕戒者，對首懺罪滅，不同七遮。而教誡師於是法中，一一好解。若不解大乘經律，若輕若重，是非之相；不解第一義諦；習種性、長養性、不可壞性、道種性、正性；其中多少觀行出入、十禪支、一切行法；一一不得此法中意。而菩薩爲利養故、爲名聞故，惡求多求，貪利弟子；而詐現解一切經律，爲供養故；是自欺詐，亦欺詐他人。故與人受戒者，犯輕垢罪。

非處說戒戒第四十二

若佛子！不得爲利養故，於未受菩薩戒者前、若外道惡人前，說此千佛大戒。邪見人前，亦不得說。除國王，餘一切不得說。是惡人輩，不受佛戒，名爲畜生；生生不見三寶，如木石無心，名爲外道；邪見人輩，木頭無異。而菩薩於是惡人前，說七佛教戒者，犯輕垢罪。

故毀禁戒戒第四十三

若佛子！信心出家，受佛正戒，故起心毀犯聖戒者。不得受一切檀越供養，亦不得國王地上行，不得飲國王水；五千大鬼常遮其前，鬼言：『大賊』；若入房舍城邑宅中，鬼復常掃其腳跡；一切世人罵言：『佛法中賊』；一切衆生，眼不欲見。犯戒之人，畜生無異！木頭無異！若毀正戒者，犯輕垢罪。

不敬經律戒第四十四

若佛子！常應一心受持、讀誦大乘經律。剝皮爲紙，刺血爲墨，以髓爲水，析骨爲筆，書寫佛戒；木皮穀紙、絹素竹帛，亦應悉書持。常以七寶無價香華一切雜寶爲箱囊，盛經律卷。若不如法供養者，犯輕垢罪。

不化衆生戒第四十五

若佛子！常起大悲心。若入一切城邑、舍宅，見一切衆生，應當唱言：『汝等衆生，盡應受三歸十戒。』若見牛、馬、豬、羊、一切畜生，應心念口言：『汝是畜生，發菩提心！』而菩薩入一切處、山林川野，皆使一切衆生發菩提心。是菩薩若不教化衆生者，犯輕垢罪。

說法乖儀戒第四十六

若佛子！常行教化，起大悲心。入檀越貴人家、一切衆中，不得立爲白衣說法；應白衣衆前，高座上坐。法師比丘，不得地立爲四衆說法。若說法時，法師高座，香華供養；四衆聽者下坐，如孝順父母，敬順師教，如事火婆羅門。其說法者，若不如法，犯輕垢罪。

非法立制戒第四十七

若佛子！皆以信心受佛戒者，若國王太子百官、四部弟子，自恃高貴，破滅佛法戒律，明作制法；制我四部弟子，不聽出家行道，亦復不聽造立形像、佛塔、經律，破三寶之罪。而故作破法者，犯輕垢罪。

自壞內法戒第四十八

若佛子！以好心出家，而爲名聞利養，於國王百官前，說七佛戒，橫與比丘比丘尼菩薩弟子，作繫縛事；如獅子身中蟲，自食獅子肉，非外道天魔能破。若受佛戒者，應護佛戒，如念一子，如事父母。而菩薩聞外道惡人，以惡言謗佛戒時，如三百鉞刺心，千刀萬杖打拍其身，等無有異。寧自入地獄經百劫，而不用一聞惡言破佛戒之聲。而況自破佛戒，教人破法因緣，亦無孝順之心。若故作者，犯輕垢罪。

如是九戒，應當學，敬心奉持。

諸佛子！是四十八輕戒，汝等受持。過去諸菩薩已誦，未來諸菩薩當誦，現在諸菩薩今誦。諸佛子諦聽！此十重四十八輕戒，三世諸佛已誦、當誦、今誦，我今亦如是誦。汝等一切大衆：若國王王子百官、比丘比丘尼、信男信女，受持菩薩戒者，應受持、讀誦、解說、書寫。佛性常住，戒卷流通三世，一切衆生，化化不絕。得見千佛，佛佛授手，世世不墮惡道八難，常生人道天中。我今在此樹下，略開七佛法戒。汝等當一心學波羅提木叉，歡喜奉行。如〈無相天王品〉勸學中，一一廣明。」

三千學士，時坐聽者，聞佛自誦，心心頂戴，喜躍受持。

爾時，釋迦牟尼佛說上蓮華臺藏世界，盧舍那佛心地法門品中，十無盡戒法品竟。千百億釋迦亦如是說，從摩醯首羅天王宮，至此道樹，十住處說法品，爲一切菩薩、不可說大衆，受持、讀誦、解說其義亦如是。千百億世界、蓮華藏世界、微塵世界。一切佛心藏、地藏、戒藏、無量行願藏、因果佛性常住藏、如是一切佛說無量一切法藏竟。千百億世界中，一切衆生受持，歡喜奉行。若廣開心地相相，如〈佛華光王七行品〉中說。

明人忍慧強	能持如是法	未成佛道間	安獲五種利
一者十方佛	愍念常守護	二者命終時	正見心歡喜
三者生生處	爲諸菩薩友	四者功德聚	戒度悉成就
五者今後世	性戒福慧滿	此是佛行處	智者善思量
計我著相者	不能信是法	滅盡取證者	亦非下種處
欲長菩提苗	光明照世間	應當靜觀察	諸法真實相
不生亦不滅	不常復不斷	不一亦不異	不來亦不去
如是一心中	方便勤莊嚴	菩薩所應作	應當次第學
於學於無學	勿生分別想	是名第一道	亦名摩訶衍
一切戲論處	悉由是處滅	諸佛薩婆若	悉由是處出
是故諸佛子	宜發大勇猛	於諸佛淨戒	護持如明珠
過去諸菩薩	已於是中學	未來者當學	現在者今學
此是佛行處	聖主所稱歎	我已隨順說	福德無量聚
迴以施衆生	共向一切智	願聞是法者	疾得成佛道